


南漢書

十三之五



					漢書門
一	二	三	四	五	
冊	架	函	號	類	

內閣文庫				
元	二	三	四	漢書
函	二	三	四	
架	冊	號	類	

內閣文庫		
番號	漢	2334
冊數	12	(7)
函號	290	173





南漢書考異卷十三

順德梁廷枏章冉撰

淺草文庫

劉傳傳

州境與正州接壤盜起推博羅縣吏張遇賢為帥

通鑑有神降於博羅縣民家註云博羅漢古縣唐屬循州時為漢土按方輿類纂博羅縣隋屬循州南漢屬正州十國春秋地

南漢書考 卷十三

異

理表亦云南漢改循州爲正別立循州於北境領龍川縣一據此則遇賢爲正州人攻據循州陸氏南唐書稱循州人張遇賢本羅縣小吏益舉其地之舊名也春秋地理表旣以博羅隸正州而殤帝紀又云遇賢循州人遇賢傳云博羅人則自矛盾矣曾芳傳

官程鄉合

黃通志曾芳者不知何許人南漢時爲程鄉令又云芳他政無所考然歷六七百年後而名傳不朽雖兒童走卒過其祠井下咸加禮拜其感人如此十國春秋亦云未詳何地人故漢時有爲廣州刺史者芳其後也廣州志曾井在潮州漢時縣令曾芳因民苦瘴以大囊藥投井令民汲飲之宋皇祐間狄青征儂智高經此軍士疾癘禱

異

於并飲泉盡愈旋師首以爲言仁宗降制封芳忠孝公且賜飛白書曾氏忠孝泉五字旌之按諸書並止稱芳仕南漢而不詳何時何主不可與諸臣次列而循良吏治難使泯沒無傳今以事蹟相類與謝傑等並附博古傳後

暨彥贊傳

家世未詳

十國春秋云或曰吳暨艷後不知所據今姑闕疑

伍彥柔傳

不知其官

宋史遣大將伍彥柔領兵赴賀按彥柔歷官無考大將不過將帥之通稱十國春秋職官表南漢無以大將爲官名者而李承渥傳忽云積功至大將宋師破連賀諸州

異

後主署為都統據其書法是又以大將為
銜名矣似誤

盧收傳

兵果謹譟多相繼走宋軍降

十國春秋兵稍稍解去不云降也按廣州
人物傳揚旗揮之果謹譟而降今從之收
人物傳連州志並作枝春秋依之今從宋
史並續通鑑

李承渥傳

每象十數人操兵刃坐象背

續通鑑十數人皆執兵伏宋史錢傳每象
十數人皆執兵仗按執兵而伏則不能戰
矣通鑑伏當即仗之訛今從宋史

兵遂大潰承渥遁歸

南漢春秋云承渥敗死按續通鑑宋史並
云軍遂大敗承渥以身免不云戰死也今

異

從之

卿文遠

續通鑑作鄒文遠今從宋史

辛延偓累官韶州刺史

續通鑑擒其刺史辛延偓宋史張傳亦作
刺史而李托傳又作節度副使兩傳互異
今從續通鑑

植廷曉傳

九國志續通鑑並作楊廷曉今從宋史

蕭灌傳

灌為右僕射

宋史太祖紀及潘美傳並作左僕射今從
張傳並續通鑑灌太祖紀作灌十國春秋
作灌今從美傳

大寶末年正月宋師進屯柵口遣灌與卓惟休
奉表詣宋軍求降

吳

宋史張傳美傳並作二月事按美等露布
劉鋹遠懼傾危尋差人使初則稱臣上表
具陳歸化之心後則設詐藏奸翻作欵兵
之計臣與將士仰憑睿旨不敢逗留於正
月二十七日到柵口鋹乃頻遣寮佐往來
商議漸無憑準似奉表求降在未到柵口
之前然續通鑑云正月甲子至柵口乙丑
至馬逕南漢主懼乃遣右僕射蕭灌中書

舍人卓惟休奉表詣軍門乞降據此則灌
等奉表求降在美等度馬逕後露布之言
知爲統舉之詞也今從之馬逕九國志作
馬逕文之訛也

馮邴傳

曾祖禧策名嶺表逮邴祖父三世爲日御至邴
仍世其職

十國春秋馮元傳四代祖官廣州烈宗據

異

南海僑斷士人故三世居嶺南爲日御大寶末元父子從後主朝宋元父某授保章正按四代祖禧卽元高祖云三世爲日御是合禧并禧子及孫同官一職而邴不與矣然考宋史元傳高祖禧以術數事劉氏傳三世至父邴云傳三世者是禧之外更歷三傳爲邴並官日御合禧實爲四世邴入宋乃改授保章正也春秋誤今從宋史

又按宋史元幼從崔頤正孫奭爲五經大義與樂安孫質吳陸參譙夏侯圭善羣居講學號四友進士中第授江陰尉時詔流內銓取明經元自薦通五經謝泌笑曰子尙少能盡通耶據此則仕南漢爲日御者自邴而止元入宋時尙幼未嘗授官也南漢春秋傳題云日御馮元亦誤

胡賓王傳

南漢書考

卷十三

七

異

韶州曲江人

南漢春秋云一作乳源人宋史地理志乳源縣乾道二年析曲江之樂昌依化鄉於州頭津置方輿類纂云乳源縣本曲江樂昌二縣地宋以韶州諸縣水道不通析置今縣於依化鄉花村頭津口按乳源即曲江舊地南漢尚無乳源之名春秋誤登咸平庚子進士

黃通志作咸平二年己亥進士然考諸志並云陳堯咨榜則咸平三年庚子矣黃志誤

異

南漢書考異卷十三終

南漢書卷十四

順德梁廷枏章冉撰

列傳第八

軒轅胡林古何梁楊吳丁列傳

軒轅述乾亨時人精通岐黃術治病多奇驗遠
近爭趨之尤好讀前代醫學諸書能自具卓識
不膠執古人成說居常孜孜著作老而不倦先
是青霞君作寶臚論三篇著變煉金石之訣述

南漢書

卷十四

既病其未善因爲刊去謬誤博採以補其缺爲
寶臚暢微論三卷成書時年已九十矣尋卒所
遺書醫家爭寶之

胡萬頃不知何地人並亡其年代幼神悟通九
宮三元之法卜事奇中百不失一撰六壬軍鑿
式三卷太乙時紀陰陽二遁立成歷二卷行世
術數之士咸守如繩尺焉

林楚材賀州富川人乾和中中宗取賀州楚材

始隸籍性樂布韋不求仕進精數學能詩一時
縉紳咸折節與之遊左僕射黃損謝病歸里於
永州滄塘湖上闢別業黃冠草服多與往來飲
酒賦詩爲樂尤好與楚材唱和嘗贈損詩有云
身閑不恨辭官早詩好常甘得句遲人多稱之
大寶末有稻田白海上浮至上魚藻門外衆方
聚觀楚材適至見之嘆曰水魚湫湫兮有好事
者在側異其語而莫明所謂因私記之未幾宋

師來潘美爲都部署方悟楚材所語於文爲潘
咸追服其先知云
古成之字亞爽正州河源人避地增城性簡靜
寡嗜好嘗結廬羅浮山力學不倦淹通群籍時
作爲詩歌以見志出語輒驚其儕輩由是名動
四方見時政百弊叢生知其國祚不永不敢求
進取入宋登第官元氏尉改知益都召除秘書
省校書郎出知魏成改綿竹卒事具宋史

何澤韶州曲江人徙家番禺父鼎有文名第進
士除著作郎遷瀧州司馬累遷容管經畧使治
所部多惠政尤善星歷時梁太祖跋扈不臣鼎
誠諸子曰汝慎毋事全忠全忠兇類安賊而宣
淫過之終有慶緒之禍他日全忠勢必改玉然
揆之星象晉分野有王氣唐當復興後果如其
言澤少承家學負俊才長於詩歌乾寧中舉進
士偕計至三峯行在舊同年崔某聞澤至欲爲

延譽緘詩贈之會崔徹爲相頗不滿於澤意別有屬主試者得澤卷心賞之而重違徹旨遂落第漂流嶺海間烈宗深加禮接辟就清海軍從事梁太祖受禪表薦於朝賜及第梁亡入唐爲洛陽令轉倉部郎中擢吏部郎中史館修撰遷太常少卿坐未拜命上章稱新官致仕晉高祖卽位以原職召用未赴卒於家事具五代史記梁文京兆萬年人先世多以仕宦顯烈宗鎮嶺

南招致中原士族文聞遂來就參議政務爲烈宗所喜署之幕職高祖嗣節度文以舊屬仍留佐軍府及將稱帝文以非王命意竊非之知群議旣定勢難中止遂不諫卽位後幕僚遍加官爵及文獨力卻不受辭去避居東莞終其身時論高之子光運官至右職捕賊與戰爲所害光運弟光遠亦仕爲兵職佐戎政光遠子頽字微之幼秉奇節強學篤行朋友稱其信義尤瞻詞

章八宋補武仙簿厯鬱林尉封州司戶參軍遷
光祿寺丞卒

楊廷藝初爲愛州將梁克貞等旣攻克交州執
曲承美使李進爲刺史進愚懦而貪廷藝欲襲
之私蓄健兒三千皆冒爲子未發使以賂遺進
進偵知其事不以聞明年廷藝突犯交州進棄
城走高祖使程寶將兵往援廷藝據城拒殺寶
高祖知不可與爭因就拜交州節度使大有十

年皎公羨作亂爲所殺公羨初爲交州牙將素
有大志惡廷藝所爲起所部攻殺廷藝而代爲
節度明年廷藝舊部吳權起兵爲廷藝復仇圍
公羨公羨使來告急高祖利其內亂將收復其
地使交王洪操援之未至公羨已敗死

吳昌文父權隸靜海節度使楊廷藝麾下爲將
頗見親信使統所部鎮愛州牙將皎公羨倡亂
襲殺廷藝據有交州權素與比肩不肯屈志事

之起所部兵聲言復仇時交王洪操以兵來助
公羨會公羨先爲權殺洪操遇權於海口與戰
亦敗權卽自爲州帥未幾卒昌文兄昌岌繼之
乾和中昌岌臨卒以位付昌文先是自權兩世
皆與我絕昌文新立遣使來臣附求靜海節鎮
中宗如所請命兼安南都護欲致其人朝遣給
事中李璵往招之昌文不欲行以道梗止璵後
終不至大寶六年卒

丁璉祖公著爲交州牙將父部領大有中楊廷
藝受高祖節旄使公著權驩州刺史兼禦蕃都
督公著卒部領嗣其任初吳昌文來納款中宗
命節度靜海軍至是卒接管諸將爭立喬知護
起峯州楊暉起武寧州昌文參謀呂處珩交州
牙將杜景碩各擁兵相持不下境內大亂土豪
多乘機嘯聚相結爲寇盜攻交州璉隨部領以
所部三萬人擊之皆敗賊黨潰散閩閩安堵交

民德之乃推部領爲州帥號大勝王部領自署
璉爲節度使使以事來告後主因命璉卽眞居
三年璉遂私嗣王號聞宋師克嶺表入貢方物
太祖命仍爲靜海節度使不數年卒

廷柑曰女子所貴節烈耳文才尙不與况武事
哉詩小戎婦人號知兵而二千餘年動人流連
乃在栢舟一什當南漢時寇賊充斥能捍衛其
鄉隅瑋瑋若鬚眉丈夫者一時竟得兩人焉求

所謂節且烈者吳氏守志而身處異地莫筌又
爲奔亡之思婦由此而外蓋未之前聞豈宮闈
之地以淫倡故俗靡風頽不知義死之可貴歟
不然何攻取虜辱之多而卒無一傳史籍也夫
史籍無傳卽謂當時無節烈之女子可也作女
子傳

女子傳

吳武牢莫李列傳

南漢書

卷十四

七

吳氏越州山陰人中書侍郎定保妻也會祖葛
有名於時賜號文簡先生父融字子華龍紀初
進士及第累遷侍御史坐累去官尋召爲左補
闕以禮部侍郎爲翰林學士拜中書舍人進戶
部侍郎遷翰林承旨定保少第進士融愛其才
以吳妻之未幾融卒會中原亂定保南遊湖湘
吳獨留長安久之定保不還因假緇服如楚求
定保至則預以故白武穆王武穆王令人引吳

先待於僧舍勸定保往與會吳下簾自蔽立簾
內誚詰定保負已定保不爲動武穆王聞深鄙
之禮意日衰定保自是去楚遊嶺吳知定保無
北歸志遂緇服終身或勸其他適者輒以死誓
武婆齊昌府人居府之西二里有智畧爲鄉里
所推服值干戈擾攘盜賊四起村落時被剽掠
人不安其居遠近深以爲患共就武商之武因
糾合近村歛資出丁就其地築一城工竣挈村

人避其中賊至率衆悉力捍禦賊捨去不復敢犯時號其城曰武婆城

牟氏尙書左丞鍾允章妻賢行素著允章名位通顯而性吝嗇官俸所入豐歲獲賞賚亦最優厚然未嘗以絲毫與人故舊雖貧欲求資助不可得被却者皆腹誹之牟乘間語允章曰妾昔事君子家止一銚無釜鬻爾時尙能款接賓友今寶貨盈室而義路榛塞戚黨中曾無所沾漑

雖富貴何足尙也因出舊所用銚示之允章大慚後乃稍散其藏積義聲日著始自嘆其內助之賢云

莫氏名釜周渭妻也渭本隸長沙娶莫生二子中宗與楚構兵渭爲我兵所俘莫母子流離昭州後渭北走入宋未暇與莫訣時二子並幼家貧不能給莫年裁二十餘父母欲嫁之莫泣曰渭非久困者今遭難遠適必能自奮於是勤女

紅親蠶碓舂贍給朝夕二子長皆爲畢婚渭時
在宋適官廣南轉運久已改娶距歸宋時且二
十餘年矣抵治使人訪其故里知莫尙存遂自
往迎之莫辭曰君既有室我不可復行且吾有
婦孫居此久足自樂不忍捨以去渭知不能強
具奏其事詔特爵爲縣君并其二子皆賜官
李氏雷州海康人勇敢有謀畧遠近皆信服後
主時荒亂無政民間孤弱者率爲勢家凌暴無
可申訴謀共推李爲帥使保衛之及宋師來討
以後主入汴時遠州將士尙多握兵未服四出
剽劫李統所部擊之皆敗走各散一方賴以安
稱之曰李夫人及卒立祠歲時奉祀不絕

南漢書卷十四終

南漢書考異卷十四

順德梁廷枏章冉撰

按軒轅述林楚材胡萬頃身非職官述與
萬頃二人以例應別立技術傳古成之未
仕南漢可不立傳然考其隱處羅浮在南
漢未滅以前踐土食粟較之石文德孟賓
于有別於例應與楚材並入隱逸傳何澤
止佐隱幕府梁文雖就巖幕而稱帝時辭

異

職遁去不可目為南漢臣例應別立幕屬
傳楊廷藝吳昌文雖稱臣而終其身不肯
入朝丁璉雖曾授旄節而私稱王號於例
亦應別立外臣傳今嫌名目繁瑣統附諸
臣之後而別為一卷

林楚材傳

賀州富川人

十國春秋林楚材故番禺布衣不測其為

何人全五代詩楚材賀州富川人按乾和
五年賀州始入南漢或其後遷家番禺也

水魚湫湫兮

青箱雜記有稻田是海中浮來布衣林楚
材嘆曰水魚湫湫兮當時好事或有記其
語泊王師至潘美為部署方悟為潘字南
漢春秋楚材見而嘆曰地宜靜不宜動一
旦浮至在水旁而有米有田於字為潘禾

異

者五穀之美其必有姓名潘美者來獲斯
土既而嘆曰水魚湫湫兮時好事記其語
及宋師至潘美爲部署方悟按楚材既云
有潘美來獲斯土是明以未來事告人何
用復作隱語且奚云美至方悟爲潘字也
况當聚觀時衆耳咸屬遽稱國家喪失而
實之以爭地者之姓名楚材以布衣而處
後主猜忌嗜殺時斷有所不敢春秋說本

廣州志然志但云識者謂於字爲潘不引
楚材語春秋牽合之而不自知其矛盾也
何澤傳

韶州曲江人

十國春秋云按通鑑註及歐陽史唐莊宗
時洛陽令何澤係廣州人先時劉陟薦於
梁擢進士第後歷唐晉官至太常寺卿中
間爵里不同似非一人也按歐史稱澤廣

異

州人原與通鑑合唐摭言作韶陽曲江人而與歐史並云父鼎容管經畧又通鑑註引薛史貞明中劉陟薦其才以進士擢第摭言亦云梁太祖受禪假廣南幕職入貢敕賜及第然則諸書所載以事蹟考之實同一人所異者鄉貫耳摭言爲王定保著與澤同時同佐南漢幕其見聞自較歐史通鑑尤確又廣州鄉賢傳何鼎番禺人考

郭棐戴璟黃佐三廣東志番禺志並云其先曲江人後徙番禺據此則摭言乃溯其世籍通鑑歐史不過指其新遷異而實同春秋失考也然有可疑者摭言謂乾寧中澤隨計至三峯行在永樂崔公卽澤之同年丈人聞澤來以一絕振之曰四十九年前及第同年唯有老夫存今日殷勤訪我子穩將鬢鬣上龍門是澤先與崔同舉進

異

士不第至乾寧中再舉時已閱四十九年也歐史晉高祖入召爲太常少卿以疾卒由乾寧中推至晉高祖天福元年已四十餘年合之四十九年則九十餘年矣其未與崔同舉之前爲年幾何尙未可考豈非在百歲以外乎又通鑑註引薛史云貞明中陟薦其才而通鑑於貞明元年已云陟自是與梁絕矣何復有表薦之事耶今惟

依春秋作官隱從事餘合摭言歐史通鑑而具書之且誌疑於此

梁文傳

避居東莞

余靖梁頽墓表文佐幕番禺劉氏據有南海耻非王命不從所署遁於東莞又云頽字微之國家削平僭僞統一函夏君卽占籍高要據此是文先避居東莞至頽入宋

南漢書考

卷十四

五

異

後始遷家高要戴璟廣東志

以下稱云文戴通志

遜於東莞宋初遂占籍高要以入宋遷高

要並作文事誤又文戴通志作吳今並從

墓表

楊廷藝傳

因就拜交州節度使

宋史後有楊廷藝紹洪皆受廣南署繼為

交趾節度使東都事畧後有楊廷藝受劉

氏爵命為其牙將皎公羨所殺通鑑天福

二年交州牙將皎公羨殺安南節度使楊

廷藝而代之據此則廷藝曾為南漢節度

使事當在程寶戰死後詳高祖紀考異

吳昌文傳

權因為州帥

宋史交趾傳時劉氏擅命嶺表遣將李知

順伐曲承美執之乃并有其地後有楊廷

異

藝紹洪皆受廣南署繼為交趾節度使紹
洪卒州將吳昌岌遂居其位據此無公羨
殺廷藝及為權殺事今從歐史並東都事
畧

女子傳考異

吳氏傳

久之定保不還

十國春秋定保舉進士第南游湖湘不為

馬氏所禮又定保既無北歸志遂緇服終
身按全唐詩註定保及第吳子華侍郎以
子妻之子華即世定保南遊湖湘吳女緇
服自長安來謁馬殷令引見於佛寺吳隔
簾謂之又直齋書錄解題云喪亂後入湖
南棄其妻弗顧士論不齒據此則吳融在
長安以女妻定保融死定保遊楚吳氏仍
畱長安故云在長安來在楚一見後是時

異

吳氏始知其夫無歸志故歸而矢志獨守
非定保初遊楚卽知其必不還也今悉補
入又按吳氏未至嶺表然定保實仕南漢
妻統於夫故爲立傳

武婆傳

齊昌府人於其地築一城

明一統志武婆故城在興寧縣西二里五
代時縣嫗武姓者糾合村舍築城自衛興

寧志城在縣西一里許十國春秋地理表
南漢乾亨元年升循州之興寧縣爲齊昌
府按明統志但稱五代時築城其年代無
考梁開平以後始稱五代是時其地頗安
謐不聞盜賊竊發惟光天元年張遇賢起
正州陷循州齊昌在其隣境武氏築城捍
衛當在此時

莫筌傳

南漢書考

卷十四

八

異

後北走入宋

大清一統志馬氏與南漢相持渭為南漢俘獲
 後脫身北走連州志渭為廣人俘獲妻子
 流離昭州劉鋹政煩賦重渭率鄉人踰嶺
 將避地零陵未至賊起斷道絕糧渭脫身
 北上據此是渭入南漢未幾即私亡入宋
 涑水紀聞太祖平廣南得渭喜以為平廣
 南得一人耳以渭歸宋在南漢亡後今從

一統志

距歸宋時且二十餘年

涑水紀聞云別二十七年

大清一

統志云二十六年連州志云與妻契濶三
 十年按連志稱渭建隆初至京師太平興
 國二年為廣南轉運副使在嶺南凡六年
 是渭以太平興國七年去任由是年逆推
 至建隆元年凡二十三年再逆推三年為

異

晟乾和十五年如云別莫二十六年則是
年銀尙未立與志稱劉銀政煩賦重避地
北上語不合如云別莫在銀立後三十年
則已在雍熙端拱之間渭時久去嶺南任
斷無去任後始遣人還求妻子之理且紀
聞已明云後以爲廣南轉運使人訪其妻
也三書各異今姑缺疑

李氏傳

雷州海康人

十國春秋地理表海康縣隸常州按明一
統志雷州府唐貞觀初改爲雷州天寶初
改海康郡至德初復爲雷州五代時屬南
漢宋隸廣南西路海康縣附郭隋於此置
海康縣唐爲雷州治宋初以遂溪徐聞二
縣併入據此南漢時海康實隸雷州常州
時屬南唐春秋誤又輿地紀勝雷州云五

南漢書考

卷十四

十

異

代郡有一女子失其姓勇敢強力衆皆信服相與築城以禦寇而女子爲之帥僞漢歸順餘黨尙行剽掠皆爲女帥所敗一方賴之女子死衆私諡寧國夫人立廟祀之按郝玉麟廣東志載李夫人事與此畧同且同時同縣當是一人因志無築城事紀勝又亡其姓今從郝志而附誌於此

南漢書考異卷十四終

南漢書卷十五

順德梁廷枏章冉撰

列傳第九

廷枏曰由漢唐來宦官之衆之重且專與夫殺害之慘而召亡之速未有如南漢之極盡無餘者也高祖初設內監數裁三百浸積而千餘人浸積而七千餘人說者乃謂其後之盛至二萬人有奇此二萬人者衣服飲食車馬僕隸之給

南漢書

卷十五

其糜耗可數計哉使能軍伍其人糧餉其費不
必問其裨於疆圉者何如而禍源先清矣然而
其君不悟也自昔三公論道尊禮之爲朝廷賓
師巖求夢卜猶恐不足備其員今乃以使令之
賤躋保傅之列褻此名也無乃實甚夫地褊勢
蹙正當急切求才則何不懸其官爵食邑招徠
豪傑之士使收其效而報其功耶然而其君不
悟也朝廷之上庶司爲陽婦寺爲陰婦人在軍

中則氣不揚宦官亦婦人類耳典禁衛猶且不
可顧俾之建高牙樹大纛擁數萬之衆與中原
全力爭微論其荒無紀律必致喪辱而後已也
以陰乘陽厥象先不利於國然而其君亦不悟
也且夫閹宦之害非其黨雖明哲有時無所逃
何者處近則言易入浸潤則惑滋深也庸主方
謂其孑然一身不作肥家室長子孫計傾心腹
而任之而其小信小忠又足以濟其陰柔忍刻

之性固結日深險詐日甚禍機遂一發不可解
族允章害諸王若許彥真林延遇者不過猶行
古來宦官之道而已矣以宦官之流毒也如此
君之縱使流毒也又如此假令國祚稍長龔澄
樞諸人得正衣冠終衽席上首惡既已無恙踵
起者復效其尤此邦之人曷其有極然而天道
禍淫之謂何能任六十州之號寒啼飢久受其
荼毒也乎此時雨之師之所以不數月至其國

都而黨之衆者散爵之重者奪柄之尊者殺抱
屈死者可以起九原而呼快也然至是而其君
仍不悟也嗚呼作宦官傳

宦官傳一

吳邵林鄧趙許陳列傳

吳懷恩番禺人事高祖爲內府局丞性謹愿典
宿衛二十餘年未嘗有小過光天初遷內常侍
殤帝驕侈居高祖喪酖酒縱聲樂醉後左右稍

不如意輒被殺廷臣畏禍莫敢言懷恩屢切諫
既而值內宴東西兩教坊伶官千餘晝夜出入
宮禁懷恩諫曰今禁中自有簫韶府內樂百餘
人皆善音律夜宴用此足矣焉用教坊若令夜
間雜入禁中不拘闈籍恐姦人竊發不可不慎
帝不聽逾年果有陳道庠之禍中宗初襲位授
宮闈諸衛押番乾和中進開府儀同三司西北
面招討使與指揮使吳珣率兵侵楚賀州楚將

徐知新來援未至城已陷懷恩設大竄城下施
機軸穿穴通竄敵兵中機多陷語詳珣傳懷恩
縱兵出擊走其餘衆鼓勵士氣乘捷攻破昭州
分掠全州境會楚內難作荆南貞懿王使人來
約共出兵分楚地帝加懷恩桂州管内招討使
特進內侍上柱國將兵屯境上密伺楚釁時楚
王兄弟方爭持不相下希廣聞懷恩復至遣指
揮使彭彥暉屯兵備於龍峒希萼亦自衡山遣

使以彥暉爲桂州都監使判軍府事靜江節度副使希隱時知桂州素惡彥暉潛遣人召蒙州刺史許可瓊可瓊畏懷恩勢銳聞召卽棄城趨赴桂州遇彥暉於城中與戰彥暉敗走衡山可瓊駐軍桂州懷恩遂據蒙州進掠桂管大擾其邊希隱可瓊不知所爲但相與飲酒對泣帝以書招之降又爲僚佐所阻懷恩突引兵至城下希隱可瓊率其衆夜斬關奔全州桂州亦爲懷

恩所拔因復析兵畧定宜連梧嚴富柳龔象等州始盡得嶺南地以功進封濮陽縣公大寶中宋丁德裕等克郴州進取連州邊將多敗死後主懼改懷恩桂州團練使令修治戰艦爲守禦計懷恩馭所部嚴臨事精察每舟成必親臨視製造稍不如法輒榜殺工役役者皆腹怨後主議親征懷恩督造龍舟十備用工竣懷恩以綿幕己手徧捫鈎楯匠役區彥希在側舉斤斷其

首墮船中左右皆驚走逾數日捕彥希棄市懷
恩慙事三朝於中宗尤被寵任嘗從幸盤龍石
室有野人出獻神丹中宗不敢食求石室深秘
處鑿石藏之左右盡屏去時從入者獨懷恩一
人其治兵最嚴整有法所向皆克捷當時戰功
推首及被害識者深以爲憂

邵廷瑁連州桂陽人自其先世居高良鄉之龍
口幼爲黃門供事禁廷殤帝嗣位爲內謁者遷
內府局令總宿衛兵軍令嚴肅性好文雅重儒
士客從他國至必先招延之察其材可用豐爲
資助而後極力引進大寶中遷內常侍時後主
驕侈日甚人情憂危廷瑁從容諫曰男兒十五
奪父志今宗社安危繫於陛下願加檢束後主
不聽會建禹餘宮成後主常避暑其中廷瑁每
從幸愛其地山水因求解去兵柄改領宮使後
主從之而仍令典兵偶入武庫驗試諸戎器多

壞乃製式親督匠役改造之既而宋受周鼎廷
瑁屢言於後主曰先朝乘唐亂故有南越之地
五十餘年幸中國有故干戈弗及而我益驕於
無事兵不識旗鼓人主不知存亡夫天下亂久
矣亂久必治自然之勢也今真主已出必將盡
有海內其勢非一天下不能已聞諸國悉珠寶
奉中國而陛下未嘗遣一介之使馳咫尺之書
珠貝犀象瑇瑁翠羽積於內府歲久而不可較

曾未聞舉以修聘一旦兵至何以禦敵後主惡
廷瑁言直深恨之未幾宋果以兵攻郴州招討
使暨彥贇與刺史陸光圖皆戰死乘勝進圍連
州圍練使吳懷恩素號善戰會爲部軍所殺後
主始思廷瑁言加開府儀同三司東西面招討
使使率舟師屯洗口宋軍旣退廷瑁撫循士卒
招撫亡叛邊禁嚴明無敢犯復繕治甲兵親爲
訓練圖復所失地同列忌其成功投無名書言

廷瑁反後主信之遣使就軍中賜死士卒排軍
門爭入見使者哀訴廷瑁無反狀請覆加核驗
不許卒被殺廷瑁雖中官然言論峭直頗羞與
群闈伍有文武幹畧博覽書史而最善騎射當
時倚爲良將旣橫死軍民皆痛哭共立祠祀於
浣口

林延遇閩清人性險詐多計術少爲閩宦者高
祖以女清遠公主歸閩惠宗閩因道遠使延遇

置邸於興王府專掌國信高祖賜以大第稟給
甚豐嘗從容問以閩事延遇不對退謂人曰去
閩語聞去越語越處人宮禁可如是乎或告於
高祖高祖以爲賢用爲內常侍使鈎校諸司事
閩惠宗被弑屢求歸國卒不許遂素服向其國
哭三日乃止中宗嗣位加甘泉宮使大被倚任
延遇亦恃其權寵與宮人盧瓊仙等表裏交煽
恣爲殺戮中宗誅殺諸王盡出其謀高王洪邈

在邕州鎮有誣其謀亂者遣延遇持醕往賜之
死乾和十四年延遇病甚自知不起言於中宗
曰臣死惟澄樞可用中宗從之故澄樞得不次
遷擢卒之日國人聞者相與撫掌稱慶云

鄧仲家世不詳乾和時爲內侍位至特進素與
陳道庠父璫有舊道庠旣引力士拉弑殤帝自
恃功高頗橫恣不法中宗性猜忌勲舊相繼皆
誅戮以苟悅漢紀一部賜道庠道庠不解持以

問仲仲叱曰憖獠韓信誅而彭越醢皆在此書
宜審讀之道庠乃悟中宗聞仲言以爲洩漏己
意逮下獄與道庠同日棄市夷其族


趙純節大寶時官內侍監性恬淡惟給事禁庭
恪盡職守不喜侵漁朝政時陳延壽龔澄樞權
傾中外李托尤恃椒房親專擅國柄中官爭攀
附之黨結益固純節雖與共事意獨不善其所
爲遇事輒自退謝酷愛植芭蕉樹軒庭檻砌間

皆滿時人以蕉迷目之

許彥真後主時爲內侍監性酷詐尤工讒間尙書左丞鍾允章惡宦官亂法請後主稍除之彥真懼誣允章謀叛誅死遂與龔澄樞同獲柄用又密結先朝李麗妃爲內援自是益無顧忌旣而妬澄樞居已上權屢被侵因相傾軋澄樞意積不平會有告彥真通麗妃澄樞力發其事彥真疑謀出澄樞與其子計圖之澄樞遣兩班將

軍王仁遇告彥真父子謀反逮下獄族誅之

陳延壽大寶時宦官與龔澄樞輩結心腹交弄權賣法後主弱年襲位盡委朝政使代剖決延壽作諸淫巧日費數百萬多方蠱惑見桂王璇興已長恐遂柄用分己權乃密奏後主言先帝得傳陛下由盡殺群弟後主然之因便愆恩稍誅諸王而先殺璇興時才人盧瓊仙最有寵亦出預外政延壽憑以爲奸又引樊胡子入宮妾



陳禍福使作玉皇言延壽等皆上天命來輔爾
當盡心委之無得妄有疑慮後主信彌篤由是
內外淫亂朝章大壞國亡後不知所終

南漢書卷十五終

天祿堂

